

na alrak na menaaniwan

inia na inuvasukan 'azi ziya sawriyan, mutulutuluz mukazalram ini na iga, sasa a Malaysiya na vavayan mukuwa kivantavanga nintaw vinavalrayan kana vēsbuk, mukuwa kanatu tokay na Ciēnpucay, kazu kana Wukeyu na biyo mukuwa patrepaya kanizu na alrak na ulra kana iga, izu na alrak mu kimazayar za iwaywaya na markamelrimelri na kanatal zatu piningaiyan. izu na vavayan na kivantavang mu kinger za mararengay temarveranse, tu payasaw marengay za “'inava u?” izu na alrak payas marengay temarveranse kanatu inaniwan, izu na kivantavang na vavayan mu tu patalramay tremepa kanini na alrak marengay za temarkantung ini na alrak payas marengay temarkantung mararengay kanantu inaaniwan za manueman. zi izu na kivantavang na vavayan mu, tu puraketaw masalr temaradadipung kiumalr, izu na alrak mu payas temaradadipung marengay za tu inaniwan za kemudakuda kana 'inava, zi temarmingkok kiyalraman kanintaw, alra trima' za sasaya na saya mu sayabēdor, izu na alrak tu maranger pakasemangal kanini na kivantavang mu semenay temaraminkok, izu na kivantavang mu 'azi mianger za tratrima'an za ciniyēnpin, maw natu sayhuwan zi tremima' lra.

ulra na trau marengay, “nu kazu ta kana kalramalraman na kinazuwan mu, maw na markasazu ta kinazalraman, nu 'inava zi sadeku ta kinazuwan mu mutelak ta zi 'azi ta muwai paetreng ta ikakud.” izu na iga mu 'azi pidawariyan mukezeng a saleman kuzawan na mena'u kaninia na iga. ini na alrak pupana marengay, “ini naku kinasayhuwan na markamelrimelri na piningaiyan, ninku ninadanadaman kanazu na zuwa kivantavanga na trau.” zi maruwaya mazalram na trau kanintaw zatu iyavaaw zi, menadanadam za sakuwania tu kezan.

kurkazalram lra ini na iga pakalikuzan mu, kazuwan lra na pupana za pulraalrang patakesi kasemangalan, aruwa lra mukuwa kemipiyaya kanatu takakesiyan, 'azi lra kuwazu kanantu katakakesiyan kana tu 'ami, mukuwa meniwaniana kietan kana seaman na paisu. zata kinasemangalan mu inia na alrak natu maza'izangan mazalram za pazangal za patakakesiyan, zi 'azi kemasu'utr mianger mena'u kanizu natu inaniwan natu etan. nu aidaian lra mu inia na alrak mu nu maruwa munadanadam zatu kasaayhuwan mu, zi marevuliyas pupatran zatu sayhuwan kanatu zekalr mu, kasaalu ta aruwa temulre'ay venakar, aruwa lra kiruwaday kanantu kalramalramanan.

115 年全國語文競賽臺灣原住民族語言朗讀文章 【知本卑南語】 高中學生組 編號 3 號

一個小販

前不久網路 風傳一個短片，一名女遊客她去柬埔寨首都旅遊，在吳哥窟的塔布龍寺遇到影片中用了 9 國語言和她交談的小男孩。

影片也在短短幾天內就吸引多達 1 百萬的觀看次數，更有人指出惡劣環境讓人成長，舒適環境會使人墮落。小男孩所以會這麼多國語言，都是跟遊客學來的。他為了生活，被磨練出這樣的能力。在影片曝光之後不久，也有願意提供獎學金，讓他能夠順利完成學業，不需要在該學習知識的年紀，在觀光區叫賣，賺取微薄的收入。